

Evening Dogri News

11th May 2024

1815 hrs

Headlines

- 1 लोकसभा चुनाव दे चौथे गेड़ लेई जारी प्रचार अज्ज खत्म होई गोआ ऐ।
- 2 चुनावी रैलिएं च भारी-रश दे बश्कार श्रीनगर च औंदे सोमवार वोट पोआए जांगन।
- 3 पुलस नै इक बड़्डी सफलता हासल करदे होई बसंतगढ़ आतंकी मामले च इक जने गी गिरफ्तार करी लैता ऐ।
- 4 एनआईए नै पाकिस्तान समर्थत आतंकी मामले च जम्मू प्रांत दी 6 थाहरें उप्पर छापेमारी कीती ऐ।
- 5 आईपीएल क्रिकेट च अज्ज संजा कोलकोता दे ईडन गार्डन च कोलकाता नाईट राईडर्स ते मुंबई इंडियन्स बश्कार मैच खेड्डेआ जाग।

<><><><><><>

4th Phase

लोकसभा चुनाव दे चौथे गेड़ दे कन्नो कन्नी आंध्रप्रदेश च इक गेड़ दे विधानसभा चुनाव ते ओडिशा च विधानसभा चुनाव दे पैहले गेड़ लेई प्रचार अज्ज संजा खत्म होई गोआ ऐ। चौथे गेड़ तैहत औंदे सोमवारें 9 राज्यें ते इक केन्द्र शासत प्रदेश दी 96 लोकसभा सीटें लेई वोट पोआए जांगन। इस गेड़ तैहत आंध्रप्रदेश दिएं 25, बिहार दी 5, झारखंड दी 4, मध्यप्रदेश दी 8, महाराष्ट्र दी 11, ओडिशा दी 4, तेलंगाना दी 17, उत्तर प्रदेश दिएं 13, पच्छिम बंगाल दी 8 ते केन्द्र शासत प्रदेश जम्मू कश्मीर दी इक सीट शामिल ऐ। इस गेड़ तैहत वोट पोआए जांगन। इसै गेड़ तैहत 25 संसदीय सीटें आले आंध्रप्रदेश ते 17 सीटें आले तेलंगाना च बी इक गै गेड़ च वोट पोआए जांगन।

<><><><><><>

PM-Odisha

प्रधानमंत्री ते बीजेपी दे वरिष्ठ नेता नरेन्द्र मोदी होरें कांग्रेस उप्पर दोष लाया ऐ जे कांग्रेस संविधान गी बदलना चाहंदी ऐ। उनें इब्बी गलाया जे कांग्रेस जेकर सत्ता च आई तां ओह पट्टीदर्ज जाति, पट्टीदर्ज जनजातीय ते होर पिछड़े वर्ग गी दित्ते जाने आले आरक्षण गी खुस्सियै अपने वोट बैंकें गी देइ देग। अज्ज दपैहरी ओडिशा दे बारगढ़ च इक चुनावी रैली गी संबोधत करदे होई श्री मोदी होरें कांग्रेस दे साबका प्रधान राहुल गांधी हुंदा नां लैते बगैर गलाया जे वरिष्ठ कांग्रेस नेता नै इक बारी डॉ. मनमोहन सिंह सरकार आस्सेआ लेते गेदे केबिन

फैसले गी फाडी दित्ता हा, जेहड़ा इस गल्ला दा सबूत ऐ जे साबका कांग्रेस अध्यक्ष होरें गी भारतीय संविधान उप्पर धनां बी भरोसा नेई ऐ।

<><><><><><>

Congress

कांग्रेस दियां महा सचिव प्रियंका गांधी होरें अज्ज आखेआ ऐ जे कांग्रेस पार्टी दी अगुवाई आली पैहली सरकार नै म्हेशां गै देश च जनजातीय समुदाय दे विकास ते उंदी रक्षा लेई कम्म कीते न। अज्ज उत्तरी महाराष्ट्र दे नंदुरबार जिले च इक चुनावी रैली गी संबोधत करदे होई उनें गलाया जे कांग्रेस नै जनजातीय समुदाय ते समाज दे गरीब तबकें दे बाद्धे विकास लेई बक्ख-बक्ख कनून जियां पंचायती राज कनून, जंगलात अधिकार कनून 2006, मनरेगा ते होर दुए कनून लेआंदे न। प्रियंका गांधी होरें प्रधानमंत्री नरेन्द्र मोदी ते बीजेपी दे लीडरें उप्पर दोष लाया जे ओह मणिपुर हिंसा ते महिला पलोआनें दे मुद्दें उप्पर अजें तगर किश नेई बोले।

<><><><><><>

Srinagar Campaign

श्रीनगर चुनावी हल्के लेई जारी प्रचार अज्ज खत्म होई गोआ। घाटी च पिदले त्रऊं दहाके मगरा चुनावी रैलिंग च लोकें दी इन्नी मती भीड़ दिक्खी गई ऐ। श्रीनगर लोकसभा सीट लेई चौथे गेड़ तैहत् औंदे सोमवारें वोट पोआए जांगन। मोटर-बाइकें ते कारें च रंग-गिरंगे काफले घाटी दे ग्राएं ते कस्बें च घूमा'रदे न की जे श्रीनगर च आतंकवाद प्रभावत हिस्से च बी मेदवारें दी इक झलक दिक्खने लेई लोकबड़े मते उत्साहित न, इनें इलाकें गी पैहले दे लीडरनो गो जोन दे रूपे च जानदे हे। कश्मीर दे पंज जिले श्रीनगर, गांदरबल, पुलवामा, बडगाम ते शोपियां तगर फ़ैले दा श्रीनगर चुनावी हल्का इक युद्ध मैदान दे रूपै च उभरेआ ऐ जेहदे च 17 लक्ख 43 जहार 845 मतदाता 24 मेदवारें दे सियासी भविक्ख दा फैसला करगंन। इत्थें उनें लोकें दी खासी गिनतरी ऐ, जिनें पैहले कदें मतदान नेई कीता, पर हुन वोट पाने दे अपने हक्क दा इस्तेमाल करने दा बेसब्री कन्ने इंतजार करा'रदे न। हालांके चुनावी मैदान च 24 मेदवार खड़ोते दे न, पर मुख्क मकाबला नैशनल कांफ्रेंस दे सईद रहुल्ला मेहदी, पीडीपी दे वहीद-उर-रहमान परां ते अपनी पार्टी दे मोहम्मद अशरफ हुंदे बश्कार त्रिकोणियै मकाबला ऐ। दफा 370 दे हटने मगरा श्रीनगर च एह सब्बने शा बड़डे चुनां न। 2019 ब'रे दे लोकसभा चुनाएं च नैशनल कांफ्रेंस दे प्रधान डॉ. फारूक अब्दुल्ला होरें 1 लक्ख 6 जहार 150 वोट हासल करियै श्रीनगर सीट थमां जितत हासल कीती ही, एहदे च मतदान दी गिनतरी शड़ी 14.1 फीसद गै दर्ज कीती गई ही।

<><><><><><>

Lone

भारती चुनां आयोग नै बारामुला लोकसभा हल्के लेई पीपल्स कांफ्रेंस दे मेदवार सज्जाद गनी लोन गी सोशल मीडिया मंच एक्स पर इक वीडियो पोस्ट करने लेई नोटिस जारी कीता ऐ। इस नोटिस च कूपवाड़ा दे जिला चुनां अधिकारी होरें लोन होरें गी पुच्छेआ ऐ जे उनें मीडिया प्रमाणत ते निगरान कमेटी थमां पैहले इजाजत लैते बिजन अपने सोशल मीडिया हैंडल पर एह वीडियो कीह अपलोड कीता ऐ।

Jammu Smart Schools

जम्मू नगर निगम नै सरकारी हायर सकेँडरी स्कूलें गी स्मार्ट सिटी दे दायरे हेठ आहन्नेआ ऐ तां जे इनें स्कूलें दे बच्चें गी बेह्तरनीन ढांचे ते डिजीटल तरीके कन्ने पढाया जाई सकै। स्मार्ट सिटी दे दायरे हेठ आए दे केई स्कूलें च डिजीटल स्मार्ट बोर्ड ते बच्चें दे बौहने लेई खरे प्रबंध बी कीते गे न।



Basantgarh

इक बड्डी कामयाबी हासल करदे होई जम्मू कश्मीर पुलसै पिछले म्हीने दी 28 तरीक गी उधमपुर जिले दे बसंतगढ़ इलाके च मोहम्मद शरीफ नां दे विलेज डिफेंस गार्ड दी हत्तेआ च शामिल आतंकवादिऐं गी सहायता ते साज-समेयान उपलब्ध करोआने दे आरोप च इक व्यक्ति गी गिरफ्तार कीता ऐ। इस बारे होर ब्योरे दिंदे होई उधमपुर दे एसएसपी जोगिंदर सिंह जसरोटिया होरें इक संवाददाता सम्मेलन दरान दस्सेआ जे पुलसै कठुआ दे लोहा नाथ्थी इलाके दे रौहने आले जावेद नां दे व्यक्ति गी हिरासत च लैता ऐ।



NIA Jammu

राष्ट्री जांच अजेसी एनआईए नै खित्ते च आतंकवाद फैलाने दी पाकिस्तानी साजश कन्ने जुड़े दे मामले च जम्मू संभाग च अज्ज 6एं थाहरें पर छापे मारे न। एह छापेमारी जम्मू संभाग दे डोडा, रामबन ते किशतवाड़ जिलें च कीती गई ऐ। खबर अजेसी एनआईए मूजब इस छापेमारी दरान डिजीटल उपकरणें ते दस्तावेजे बगैरा सनें हाईब्रिड आतंकवादिऐं ओवर ग्राउंड वर्करें ते आतंकवादिऐं दे मददगारें दे ठकाने थमां ऐतराज-जोग समेयान बी बरामद कीता गेआ ऐ।



S.Jaishankar

विदेश मंत्री डॉ. एस.जयशंकर दहोरें आखेआ ऐ जे अभिव्यक्ति दी अजादी दा मतलब अलगाववाद गी स्वतंत्रता नेई ऐ। कनाडा च अलगाववादी घटनाएं बख्खी इशारा करदे होई उनें गलाया जे अलगाववाद ते हिंसां दा समर्थन करने आलें गी कनाडा दी सियासत च बख्खरी थाहर दितती जा'रदी ऐ। कल इक समाचार अजेसी कन्ने गल्लबात करदे होई विदेश मंत्री होरें आखेआ जे कनाडा दी सियासत च नेइयां किश मन्ने परमन्ने देचेहरे न, जेहड़े अलगाववाद ते चरमपंथिएं गी बढावा देआ'रदे न। उनें गलाया जे भारत नै जदूं बी इस मुद्दे गी पुट्टेआ ऐ तां कनाडा सरकार नै इसी अभिव्यक्ति दी अजादी गलाया ऐ। भारत-चीन रिश्ते बारे गल्ल करदे होई विदेश मंत्री होरें गलाया जे हर इक देश अपने गोआंढी मुल्ख कन्ने दोस्ताना रिश्ता गै चांहदा ऐ, पर अज्ज साढा रिश्ता चीन कन्ने सामान्य नेई ऐ, कीजे बन्ने उप्पर शांति च खलल पेई गेदा ऐ।



e-Bus

स्मार्ट सिटी परियोजना दे तैहत प्रशासन नै जम्मू जिले च चलै करदी ई-बस सेवा दा दायरा होर बधाई दित्ता ऐ। अज्जै थमां जम्मू ते कठुआ बश्कार बी ई-बस सेवा शुरू करी दित्ती गई ऐ। शुरूआती तौर पर जम्मू ते कठुआ बश्कार 5 ई-बसां चलाइयां गेइयां न। इनें एसी बसें च 35-35 सुआरियां ब्हालने दी समर्थ ऐ ते इंदा इक बक्खी दा कराया 160 रपे मुकरर कीता गेआ ऐ। एह बसां 2 घंटे च अपना सफर पूरा करगंन। इस बारे च साढ़े कठुआ संवाददाता नै इक ई-बस दे डरैवर कन्नै चेचे तौरा पर गल्लबात कीती।

<><><><><><>

Katra Shrine

माता वैष्णो देवी जी दे दरबार इस बरे 10 मई तगर 31 लक्ख शा बी मते श्रद्धालुएं मत्था टेकेआ ऐ, जेहदे कन्नै पिछले 5एं बरें दा रिकार्ड त्रुटी गेआ ऐ। अधिकारिएं दस्सेआ ऐ जे कटड़ा च यात्रुएं दी गिनतरी बधाइयै 40 ज्हार करी दित्ती गई ऐ। माता वैष्णो देवी जी दा दरबार, मन्ने परमन्ने दी धार्मिक थाहरें शा इक ऐ, जित्थें रोज ज्हारें दी गिनतरी च श्रद्धालु देश दे बक्ख-बक्ख हिस्सें थमां मत्था टेकन औं दे न।

<><><><><><>

IPL

आईपीएल क्रिकेट च अज्ज संजा साढ़े 7 बजे कोलकोता दे ईडन गार्डन च कोलकाता नाईट राईडर्स दा मकाबला मुंबई इंडियन्स कन्नै होग। इस प्रतियोगिता च 8 मैच जित्तियै ते 3 मैच हारियै कुल 16 अंके दे कन्नै कोलकाता नाईट राईडर्स ऐल्ले पैहले नंबरे पर ऐ। दूर्ई बक्खी मुंबई इंडियन्स नै अजे तगर खेड्डे दे 12 मैचें च शडे 4 मैच गै जित्ते दे न ते ओ प्रतियोगिता च ऐल्ले 9मीं थाहर पर ऐ। कल होए दे मैच च गुजरात टायटंस नै चेन्नई सुपर किंग्स गी 35 रंजे कन्नै हराई दित्ता हा।

<><><><><><>